

南

漢

書

南漢書卷八

順德梁廷枏章冉撰

列傳第二

廷枏曰建國若樹木然枝弱者幹必壞若觀水然流塞者源必壅自然之理也南漢僅僅數十州之地以語礪山帶河勢固有所不足然高祖封王諸子必因其地以爲爵豈不知名實相悖哉蓋隱示以維城之義使後之人知屏藩之重

之不可棄耳又安能料夫傳不再世竟歸猜忌
殘忍者之手而罷之囚之酖之殺之并其子而
盡殲之求一芽蘖之留於後而不可得耶後主
聽言不聰踵乃父覆轍桂王首及於禍厥後宋
師南征將乏謀畧軍無鬪志急難之宗室正王
而外更無他人向非戎馬生郊能保厥元至於
是歟假令當日剗削未盡宗盟尙典宿衛握兵
柄破竹之勢未嘗此其易易也作諸王公主傳

諸王公主列傳

高祖諸子

雍王耀樞高祖長子也未詳所生母大有五年封未幾薨

康王龜圖高祖第二子殤帝兄也大有五年與耀樞等同日並封亦早薨

越王洪昌高祖第五子大有五年封幼卽孝謹有知識深爲高祖所喜高祖疾大漸時雍王康

王並早逝殤帝於諸王中最長當立高祖召右
僕射王勰與語呼殤帝及中宗小名曰壽雋雖
長然皆不足任吾事惟洪昌類我意欲立之奈
何吾子孫不肖後世如鼠入牛角勢當漸小爾
因歔歔泣下勰勸帝出殤帝鎮邕州中宗鎮容
州立洪昌爲太子議已定會崇文使蕭益入問
疾高祖以其事訪之益力言其不可乃止光天
初正州賊張遇賢自稱中天八國王擁衆數萬

攻下郡邑據循州殤帝命洪昌爲都統與弟循王洪杲同將兵討賊次錢帛館洪杲先犯賊鋒洪昌繼之賊大至洪杲戰敗裨將萬景忻等以大楯翼洪昌及洪杲潰圍出殤帝旣得位驕淫不親政事逆意者輒死洪昌屢諫不聽已而果爲陳道庠等所弑洪昌聞變帥諸王哭臨迎中宗卽位應乾改元論迎立功加太尉兼中書令諸道兵馬都元帥知政事中宗因弑立不順慮

諸王爲亂謀盡誅之洪昌素賢頗得衆心尤所
切忌乾和二年三月使如海曲祭烈宗陵先伏
盜於昌華宮以待洪昌至爲盜殺

齊王洪弼高祖第六子大有五年封應乾初出
爲建武節度使聞弟循王洪杲爲劉思潮等所
譖被殺自以身居大鎮懼禍及表請受代入覲
許之旣至命幽於私第乾和五年九月出殺之
韶王洪雅高祖第七子大有五年封中宗初立

以劉思潮等譖殺循王洪杲頗疑洪雅有異圖
是年冬卽命洪雅致仕乾和三年八月殺之

鎮王洪澤高祖第八子大有五年封出鎮邕州
有善政聲績懋著中宗聞而惡之會乾和二年
有鳳凰見於邕管中宗疑爲洪澤瑞恐惑人心
益怒使人賜以酒置毒其中飲之遂暴薨

萬王洪操字貞度高祖第九子鎮王洪澤母弟
也而未詳所生母大有五年封幼知書比長識

量過人十年交州牙將皎公羨殺安南節鎮楊
廷藝自據交州廷藝故將吳權舉兵攻之公羨
以賂來求救高祖欲乘其亂取之遣大將梁克
貞領兵南下自護其軍爲應以洪操爲靜海節
度使徙封交王使統衆自白藤江趨交州會權
已破殺公羨引兵親來海口逆戰先於南口多
植大杙悉銳其首目以鐵潮水方漲權遣輕舟
乘潮挑戰舟陽敗遁洪操乘勝追逐須臾潮落

我舟爲鐵楸所絙盡裂士卒皆沒水死傷過半
洪操戰敗被擒爲權所殺高祖哭之大慟收餘
卒還

循王洪杲字日宣高祖第十子母謝氏有寵拜
尙儀以乾和七年生大有中高祖盡封諸子洪
杲時十歲卽受封爵稍長好步鬪復便弓馬以
膽勇稱諸王皆習儒術或勸之讀書洪杲曰我
家世功名皆起馬上奈何使我獨老一經乎高

祖山是敘以兵書畧通大義光天初張遇賢作
亂東方州縣多爲所陷洪杲自請統軍討賊
帝以其年幼不許洪杲曰兵法尙變不尙齒請
之益固乃令越王洪昌爲都統以洪杲爲副統
兵至錢帛館軍士方食賊猝至洪杲率親信數
百人介甲躍馬徑入賊中殺數百人被傷者無
算賊少却洪昌領所部繼至與賊大戰自辰及
午賊益盛洪杲軍被圍數重屢突不得出矢下

如雨兵士大半中射死洪杲矢盡挺劍立戰血流滿袖時陳道庠爲元帥府步軍都指揮使隨行軍中與萬景忻等奮力救出得免賊旋解去以戰功授桂州觀察使洪昌旣迎立中宗引洪杲同心翊戴加副元帥參預政事先是中宗使劉思潮等拉弑殤帝人情詢詢謗議騰沸洪杲屢請討賊陰勸暴思潮等罪殺之以息外議中宗不聽語竟外洩遂爲思潮等側目共譖洪杲

蓄異志將謀亂中宗反遣思潮偵之一日洪杲
在私第偕所親飲酒思潮與譚令禪領兵排闥
突入斬其首以洪杲反狀還報中宗信之

恩王洪曄高祖第十一子大有五年封乾和五
年九月被殺

高王洪邈高祖第十二子大有五年封乾和中
詔除建武節度使出鎮邕州時諸王方以無辜
相繼被戮洪邈知中宗必不釋於已恐居外易

得罪自陳願畱典宿衛不許洪邈素柔懦至鎮委政僚屬每飲酒必至酣醉醒則禱神禳災禍而已十二年有人上書誣洪邈在鎮謀作亂中宗遣甘泉宮使林延遇就邕州賜酖殺之

同王洪簡高祖第十三子大有五年封後與齊王洪弼等同日見殺

益王洪建高祖第十四子大有五年封中宗嗣位諸王皆就戮洪建亦爲所殺

辨王洪濟高祖第十五子大有五年封乾和五
年被殺

貴王洪道高祖第十六子大有五年封乾和五
年中宗出韶王洪弼於私第殺之遂及洪道

宣王洪照高祖第十七子大有五年封乾和五
年中宗既殺韶王洪弼洪照與兄恩王洪暉等
七人同日見殺

通王洪政高祖第十八子差長於洪益大有五

年與諸兄同時受封高祖支子十七人中惟
王耀樞康王龜圖早死萬王洪操戰沒於交州
之役餘皆次第誅戮獨洪政僅存出爲正州節
度使至乾和十三年夏卒亦被殺

定王洪益高祖第十九子大有五年封乾和五
年與兄齊王洪弼等八人同日被殺洪益於諸
王中年最幼至是遭慘戮國人冤之

中宗諸子

桂王璇與中宗第二子也乾和十一年封後主
卽位淫荒無度宦官陳延壽欲恣行威福慮爲
諸王所制密言於帝曰先帝所以得傳陛下者
由盡殺諸弟也因勸稍誅諸王後主信之遂殺
璇與時大寶三年也

荆王慶興中宗第三子乾和十一年與兄桂王
璇與弟荆王保興梅王崇興同時並受封爵不
知其終

正王保興中宗第四子乾和十一年封後主在東宮於諸弟中惟保興頗相友愛及嗣位軍國事多咨委之大寶十四年宋潘美等來伐次師馬逕後主遣左僕射蕭灌等詣美軍乞降美以灌等赴汴後主益懼促保興率百官迎美等時招討使郭崇岳屯柵口保興爲所遏不得出美等進攻後主復遣保興率衆併力迎戰植廷曉繼之大敗保興奔還美等入城俘宗室官屬保

與逃匿民家搜得之與後主同至宋京太祖赦後主罪以保興爲右監門率府率

梅王崇興中宗第五子乾和十一年封

後主諸子

守節後主長子不詳所生母大寶十四年國亡隨後主入宋累官崇儀副使

守正後主第二子入宋官至崇儀副使旣卒宋太祖聞其家貧詔月給以萬錢子克昌官三班

奉職國昌官三班借職

守素後主第三子宋咸平中官侍禁家貧甚宋真宗聞之詔賜白金百兩語宰臣曰諸僞主子孫率多窘迫蓋僭侈之後不知稼穡之艱難所致也轉西頭供奉尋改東頭供奉未幾遷內殿崇班天禧中擢爲閤門祗候卒

守通後主第四子仕宋爲供奉官

增城公主烈宗女也乾亨九年長和驃信鄭昱

遣其布燮鄭昭淳來求婚以朱鬃白馬爲聘高祖宴之使諸臣與賦詩皆不及遂以公主歸夏
逾年夏服丹藥毒發死公主竟終於長和

清遠公主高祖女有殊色乾亨元年閩太祖遣使來爲其子牙內都指揮使延鈞求婚高祖以公主歸之延鈞旣嗣位以太祖才人陳金鳳爲
媼如陳氏性窈窕善歌舞嬖之專房由是公主寵日衰永和元年卒被廢而立陳氏爲后

平陽公主未詳其所生好遊覽名勝韶州中興寺有僧達摩所遺衣鉢代相傳授閱年旣久寺僧寶藏不輕示人公主至索觀摩挲不忍釋忽手指所觸鉢竟闕陷公主深爲嘆惜因賜寺僧莊田三千畝使歲收其稅之人酬之

素馨劉氏不詳所生體質絕艷死葬恩州陽江縣東未幾塚上忽生那悉茗花因以女名名之

南漢書卷八終

南漢書考異卷八

順德梁廷枏章冉撰

洪昌傳

聞變迎中宗卽位

通鑑明旦百官諸王莫敢入宮越王洪昌帥諸弟臨於寢殿迎洪熙卽皇帝位十國春秋乃云洪昌乃帥兵迎中宗於寢殿按洪昌入寢殿哭臨後乃迎立洪熙如春秋

所書似洪熙先在寢殿至是乃迎立之也
其書法已誤且倉卒聞難諸王百官不敢
先入洪昌故首帥諸弟入臨當日不聞有
人爭立何遽稱兵於情事亦似未當也今

從通鑑

乾和二年春三月使如海曲

歐史二年夏遣洪昌祠襄帝陵於海曲通
鑑在是年三月丁亥十國春秋中宗紀亦

云三月而無日洪昌傳止云乾和二年并
無月日今從通鑑

洪弼傳

出爲建武節度使

通鑑作雄武節度使註云詳考本末雄武
當作建武建武軍邕州今從之

洪操傳

戰敗被擒爲權所殺

異

通鑑須臾潮落漢艦皆礙鐵杙不得還漢
兵大敗士卒覆溺大半洪操死漢主收餘
衆慟哭而還十國春秋潮退舟還轆轤者
皆覆洪操溺死按兩書皆無被擒事今從
九國志

洪杲傳

陳道庠萬景忻奮力救出得免

通鑑漢兵不利二王皆爲賊所圍指揮使

陳道庠等力戰救之得免九國志洪杲傳
裨將萬景忻等蒙以大楯翼二王以出按
通鑑無景忻名洪杲傳無道庠名今從歐
史蓋二王並爲元帥道庠時官元帥府馬
步軍都指揮使東征之役自在行間傳偶
闕書耳

思潮與譚令禪領兵突入斬其首

歐史洪杲陰勸晟誅思潮等以止外議晟

異

大怒使使者夜召洪杲洪杲知不免乃留
使者入具沐浴詣佛前祝曰洪杲誤念來
生王宮今見殺矣後世當生民家以免屠
害因涕泣與家人訣別然後赴召至則殺
之不云爲思潮所譖且殺洪杲盡出晟意
與九國志通鑑異今從九國志

洪邈傳

詔除建武節度使

通鑑註雄武當作建武建武軍邕州十國
春秋洪弼傳旣從註書建武節度而洪邈
傳復云出爲雄武節度使兩傳互異今仍
從通鑑註

洪政傳

出爲正州節度使乾和十三年夏卒亦被殺

十國春秋乾和十三年爲正州節度使是
歲夏被殺阮通志職官表依之按通鑑止

云六月南漢主殺正州節度使通王洪政
其出領節度之年月已無可考春秋誤會
通鑑之文遂以見殺之年爲領官之年耳
守正傳

宋太宗聞其貧

宋史張傳止云守正卒帝聞其家貧按守
正卒年無考今以上文太宗大笑賞賜甚
厚語文法順敘至此似所云帝卽指太宗

言更以下文守素爲侍禁家貧眞宗賜白金百兩語証之此處旣明書眞宗則帝字指太宗益無可疑

增城公主傳

增城公主烈宗女也

公主歐史作縣主今從通鑑通鑑漢主以女增城公主妻之以公主爲高祖女十國春秋依歐史作隱女今從之

長和驃信

歐史作雲南驃信按通鑑長和卽唐之南
詔也註云唐末南詔改曰大禮至是又改
曰長和釋文云驃信南詔也通鑑辨誤駁
之謂唐末南詔改國曰長和其君曰驃信
長和者南詔也驃信者南詔之君也今從
通鑑

遣其弟布燮鄭昭淳來求婚

歐史雲南驃信鄭覓遣使致朱髯白馬以
求婚使者自稱皇親母弟清容布燮兼理
賜金錦袍虎綾紋攀金裝刀封歸仁慶侯
食邑一千戶持節鄭昭淳按五代會要郭
崇韜平蜀之後得王衍所得蠻俘數十以
天子命令使人入其部被止於界上惟國
信蠻俘得往續有轉牒稱督爽大長和國
宰相布燮等上大唐皇帝奏疏一封又鑒

戒錄南蠻所都之地曰長和國呼宰相爲
布燮據此則昭淳以皇親爲宰相歐史所
云布燮卽其官也

使諸臣與賦詩皆不及

歐史昭淳好學有文辭龔與遊燕賦詩龔
及羣臣皆不能逮據五代會要大長和國
宰相布燮等上大唐皇帝奏疏一封所署
有彩牋一軸轉韻詩一章章三韻共十聯

有類擊筑詞又鑒戒錄王蜀後主乾德中
南蠻選布燮段義宗判官贊衛姚峯等爲
使入蜀義宗談論敷奏一歌一詠捷應如
流又錄其題大慈寺芍藥等詩五首且云
似此製作實爲高手云云按南詔人能工
聲律體製實同中國南漢諸臣絕少文采
自是難與抗衡歐史所稱據此益信

平陽公主傳

異

公主手指觸鉢闕

七修類藁六祖慧能傳五祖衣鉢開元三年沒廣韶新三州官僚門徒爭迎真身眾莫決焚香禱曰香指處師所歸焉因香指曹溪僊龕并衣鉢建塔事之五代劉鋹迎衣鉢至廣夫人觸之鉢墮地修補不得捨田數十頃贖罪鉢非銅鐵木石云云貴耳集鉢猶存有一痕僞劉公主所觸今寺補

鉢莊公主捨也與類藁稱夫人所觸異癩
暈山房集漢家公主號平陽鳳輦來遊織
指玷又與類藁稱迎衣鉢至廣異其云公
主與貫耳集合今並從之

素馨劉氏傳

塚上忽生那悉茗花以女名名之

嶺海賸引陸賈南越行記云獨茉莉與素
馨特芳香不隨水土而變似賈時已有素

馨之名然按南方草木狀有耶悉茗茉莉
花亦引賈行記但云南越之境五穀無味
百花不香此二花特芳香據此則未嘗名
素馨也今從潛確類書又銀宮人亦以喜
簪那悉茗花名素馨彼蓋人因花名此則
花因人名意此先而彼後也

南漢書卷九

順德梁廷樞章冉撰

列傳第三

廷樞曰予采南漢事幾無可稱述而獨於其開
國諸臣低徊不能置何哉五嶺之南自李唐以
前聲名文物遠不逮夫中原光化天復之間擾
攘干戈事益多故一旦策以治安恐非嶺表二
三君子所能任趙光裔李殷衡之徒皆出自中

朝華胄竭其耳目手足心腹腎腸以定規模以
匡庶績創垂五十餘載視他國運祚較長雖曰
天實爲之抑微之數人者不及此乾和而後老
成漸卽凋零爾時兵革繁興勢不得不重武臣
而輕揆輔劉博古謝傑李璵輩僅稱循吏或備
皇華其他文學詞臣又乏幹材官位亦終於不
顯逮至群閹柄國百職夤緣入補中官方且狼
狽爲奸奔走趨承之不暇能於蠶室中求直諫

忠蓋士哉然而郴州之陷暨彥贊陸光圖死之
賀州之失伍彥柔死之馬逕之戰植廷曉又死
之校首捐軀明知其無濟但令千百年來謂君
雖昏暴猶有慷慨殉死節之臣爲史乘稍畱餘
光也惜乎僅矣作諸臣傳

諸臣傳一

趙楊李倪王列傳

趙光裔字煥業世居京兆奉天遷洛陽遂爲洛

陽人曾祖植唐嶺南東道節度觀察使祖存約
興元府推官值軍亂死節度使李絳難父隱登
大中三年進士第累官至中書侍郎兼禮部尙
書同平章事封天水縣伯光裔少以力學修行
著光啟三年進士擢第乾寔中累遷司勳郎中
宏文館學士改膳部郎中知制誥賜金紫服唐
亡入梁仍舊職開平二年梁太祖以烈宗兼靜
海節度光裔與右補闕李殷衡並充官告使至

南海烈宗雅重之畱置幕府已而奏以自副高祖稱帝進兵部尙書改門下侍郎同平章事光裔自以家望顯達甲中朝耻事霸國恆怏怏思歸高祖乃習爲光裔手書遣人入洛問道取其家屬至自是乃感慰盡職大有中與楚連歲構兵光裔從容奏曰自馬皇后崩後四五年來未嘗通使於楚親隣舊好不可忘也因薦李紆有專對才可充使高祖從之楚亦報聘故終高祖

之世不復有楚難十二年十二月卒光裔相高
祖二十餘年府庫充實輯睦四隣邊烽無警當
時號稱賢相初光裔與兄光逢弟光允皆第進
士光逢以中書舍人爲翰林學士時光裔已由
膳部郎中知制誥對掌內外絲綸光允亦官駕
部郎中伯仲並列清華咸以方雅自高北人間
其名者皆望風欽重其後光逢相梁光允相後
唐光裔及子損先後相繼爲相一家同時有四

相國談者誇爲縉紳盛事損光裔長子事高祖
爲翰林學士承旨尙書左丞光裔歿高祖卽以
損爲門下侍郎同平章事逾年卒次子益李紆
大有時爲諫議大夫有風采工酬對以光裔薦
出使於楚見文昭王具言兩國新好當棄舊嫌
從此安邊息民要於永久爲兩國利文昭王喜
甚厚加欵接禮成而還

楊洞潛字昭元始興人先世自唐祭酒潤生回

爲遂寧太守曾祖勉由蜀來因家焉祖垂父軫
代著清德洞潛少通經史有權畧仕唐爲邕管
巡官秩滿客南海烈宗嘗師之薦試大理評事
清海建武節度判官高祖權畱後洞潛首言刺
史不宜用武夫當廣延中州人士置之幕府選
刺諸州俾宣政敎則民陰受其福高祖從之由
是名流畢集分任得宜嶺表獲安先是乾化初
鎮南畱後盧延昌荒於田獵指揮使黎球殺之

而有其衆延昌故將譚全播素號知兵恐禍及
稱疾請老未幾球暴卒牙將李彥圖代知州事
全播愈稱疾篤洞潛聞之力勸高祖興師以攻
韶刺史廖蕤戰敗奔楚遂取韶管旣而楚表姚
彥章權知容州高祖攻之急洞潛隨軍贊畫動
中機宜彥章不能守容州下乘勝拔高州盡有
五管之地以功表爲節度副使御史中丞明年
散騎常侍韋叡以梁太祖意來勸和洞潛因請

遂聯婚楚國爲久計高祖稱帝擢兵部侍郎同
平章事洞潛以趙光裔家世顯貴遂使居己上
高祖嘉其意遂以光裔爲兵部尙書是時國業
初創諸多簡陋因陳上吉凶禮法請立學校開
貢舉設銓選一依唐制百度粗有條理高祖嘗
作水獄毒罪人他刑法亦過酷洞潛切諫不聽
繼又命秦王判六軍所募宿衛千人皆市井無
賴洞潛入諫曰秦王國之家嗣使治軍旅已過

矣況令狎昵群小乎高祖曰小兒輩偶親戎事
乃過煩公慮耶洞潛遂出一日見衛兵攫商旅
金帛人以秦王故忍不敢訴嘆曰國事如此安
用宰相爲卽謝病歸久之不召大有八年卒於
家洞潛善風鑑嘗直政府適有梁愚堂者授潯
水令入謝洞潛見之語同列曰此人血脉貫眸
子行步矍鑠類驚雷當有風雷之厄衆咸不信
及愚至縣未幾颶風壞解舍被壓死始服其言

李殷衡趙郡人曾祖吉甫以父栖筠蔭補唐左
司禦率府倉曹參軍累官兵部尚書兼中書侍
郎同平章事卒諡忠懿祖德裕官至太尉封衛
國公貶崖州司戶參軍追贈尚書左僕射父燧
仕汴宋幕府貶象州立山尉徙郴州初德裕柄
國威望獨重一時及宣宗卽位仇人之黨相繼
擠陷子弟皆坐貶謫殷衡適當其會故名位不
獲通顯入梁後太祖擢爲右補闕開平二年副

趙光裔充官告使來授烈宗旌節烈宗畱之不
遣使佐其幕府殷衡亦以中朝兵革相尋惟嶺
外可避亂遂安之烈宗折節下士敬禮不少衰
軍事多所參畫已而署爲節度判官乾亨初遷
禮部侍郎同平章事卒於官

倪曙字孟曦福州候官人唐乾符四年舉進士
試於京兆故事神州解選自開元天寶之際率
以在上十人謂之等第必求名實相副者送小

宗伯倚而選之時制已久停至是崔洵爲京兆尹復置焉以萬年縣尉爲試官試火中寒暑退賦殘月如新月詩曙名列第五至中和時乃再舉及第除太學博士文字雅爲唐僖宗所知當時制詞有螢雪服勤屬詞清妙之語黃巢作亂棄官歸福州會閩太祖從子延彬爲泉州刺史廣招賓客曙與進士徐寅陳郊等並遊幕中賦詩酣酒爲樂居久之出遊嶺表烈宗耳熟其名

既至延接殷洽因止就幕屬高祖卽位擢工部侍郎進尙書左丞乾亨五年詔同平章事卒官曙工科舉之學有賦名著有賦一卷

王定保南昌人舉唐光化三年進士第以中原喪亂南遊於楚謁武穆王不爲所禮去之已而除容管巡官遭亂不得還久客嶺表時從叔渙爲烈宗記室因知其才招禮之辟爲幕屬逮事高祖軍國事多所匡正每勸高祖將順中朝守

藩節時梁室多故高祖求都統四鄰進爵南越
兩表皆不允高祖怒欲自稱帝號憚定保不從
先遣出使荆南俟其出境乃舉卽位禮事定而
定保還復慮其非己預使工部侍郎倪曙迎勞
之且告以建國事定保曰立國當有制度頃吾
入自南門清海軍額猶在是藩鎮之名號未除
也藩鎮而稱制四方不取笑乎曙入述其言高
祖笑曰吾備定保久獨未思及此其見譏宜也

大有初官。宣遠節度使十三年。趙損卒。八代爲中書侍郎同平章事。不逾年卒。定保少力學富文詞。高祖嘗作南宮土木華麗。聚珠飾之。定保獻七奇賦。同朝嘆賞。稱絕倫。性謙抑。好諮訪。朝廷典故。待其族先輩。唐丞相溥外舅。翰林吳融最久。備聞緒論。所與游者。陸扆。李渥。顏蕘。盧延讓。楊贊。圖崔藉若。皆一時名下士。以故見聞。賅治著唐摭言十五卷。述唐代貢舉之制。至爲詳

備先是定保南遊畱仕高祖其家屬仍在嶺北
妻吳氏緇服守志終其身

南漢書卷九終

南漢書考異卷九

順德梁廷枏章冉撰

趙光裔傳

父隱登大中三年進士

新唐書會昌中擢進士第按舊唐書隱以
父羅非禍泣守松楸十餘年不應辟命會
昌中父友當權要敦勉仕進方應弓招累
爲從事大中三年應進士舉登第據此則

隱以會昌中就辟爲從事至大中間乃登第也今從舊書

光裔與兄光逢弟光允皆第進士

歐史光裔作光允按新唐書趙隱傳子光裔光逢光允皆第進士舊唐書云光逢乾符五年登進士第光裔光啟三年進士擢第光允大順二年進士登第據此則光允實光裔之弟也歐史誤

充官告至南海烈宗畱置幕府

舊唐書光裔光啟三年進士擢第累遷司
勳郎中宏文館學士改膳部郎中知制誥
季述廢立之後旅遊江表以避患嶺南劉
隱深禮之奏爲副使因家嶺外歐史是時
天下已亂中朝人士以嶺外最遠可以避
地多遊焉唐世名臣謫死南方者往往有
子孫或當時仕宦遭亂不得還者皆客嶺

表王定保倪曙劉濬李衡周傑楊洞潛趙
光裔之徒隱皆招禮之又云曙以避亂往
衡以奉使往皆辟置幕府按兩書皆以光
裔避亂入嶺南而歐史奉使者止李殷衡
一人並與通鑑異然歐史又稱光裔耻事
僞國怏怏思歸然則光裔之在嶺南蓋因
來使被畱不得歸非避亂來此安爲樂土
明矣今從通鑑

光允相後唐

南部新書趙光逢爲司徒致仕光裔入相
有日省問其兄語及政事他日光逢署其
戶曰請不言中書事其端默如此永樂大
典載薛史光逢傳梁末帝愛其才徵拜司
空平章事無幾以疾辭授司徒致仕同光
初弟光裔爲平章事時謁問於私第嘗語
及政事他日光逢署其戶曰請不言中書

事四庫館編次薛氏舊史於光允傳註云
新舊唐書俱云趙隱子三人光逢光裔光
允爲後唐相者光允也原本作光裔誤按
通鑑同光元年十一月光允與韋說並拜
平章事而光裔先以開平二年使南海被
留中間相隔十六年相唐一事薛史舊文
誤按此不知永樂大典誤改抑薛氏舊文原誤以光允爲光裔
確無疑義

欽定四庫全書提要稱

南部新書作於大中祥符間則成書在薛史之後當沿薛史而誤也

已而奏以自副

通鑑乾亨改元以梁使趙光裔爲兵部尙書節度副使以爲授副使在巖稱帝後十國春秋烈宗畱之奏爲節度副使又以爲授副使在巖稱帝前按巖卽位時光裔旣授京職當不復出副節度矣今從春秋

異

楊洞潛傳

遂拔韶州

至

容州下

黃通志嘗爲隱畫策取湖南容管十國春秋亦云時爲烈宗畫策取湖南容管頗爲楚人所懼高祖繼立洞潛力請興師取韶州兩書皆以南漢取容州在取韶州前且皆作隱時事按歐史卒出兵攻敗盧氏取潮韶又西與馬殷爭容桂取容管通鑑兩

事皆在乾化元年攻破韶州在十二月乙卯後取容州在癸亥後先後較然且是年隱三月薨韶容兩處用兵均於隱無涉今從通鑑又春秋洞潛傳旣以爲取容先於取韶而高祖紀無取容州事似仍以取容爲隱時事也亦自矛盾

以功表洞潛節度副使御史中丞

通鑑洞潛爲兵部侍郎節度判官同在乾

異

亨改元時歐史隱嘗師事之以爲節度副
使及龔僭號爲陳吉凶禮法是又以授副
使爲隱時事矣今從十國春秋

李殷衡傳

父燧

十國春秋不載所生歐史衡德裕之孫按
新唐書李德裕傳子燧燧子延古無殷衡
宰相世系表德裕字文饒相文武生椅渾

熈渾北部員外熈彬尉生殷衡延古則殷
衡實熈長子也殷衡歐史作李衡無上一
字

倪曙傳

擢爲工部侍郎

南部新書倪曙有賦名爲太學博士制詞
螢雪服勤屬詞清妙因廣明庚子避亂番
禺劉氏僭號爲翰林學士云云按歐史十

異

國春秋皆無爲翰林學士事嚴建國與趙
光裔等數人皆以舊僚驟進尙書侍郎不
兼別官曙時已爲工部侍郎似不應復官
翰林也今從歐史舊唐書翰林學士無定品
乾亨五年詔同平章事

歐史乾亨元年倪曙以工部侍郎平章事
通鑑龍德元年卽南漢乾亨五年是歲以尙書左

丞倪曙同平章事兩說互異今從通鑑

王定保傳

南昌人大有十三年同平章事不踰年卒著唐
摭言十五卷

通鑑晉天福五年是歲漢門下侍郎同平
章事趙損卒以寧遠節度使南昌王定保
爲中書侍郎同平章事不踰年卒天福五
年卽南漢大有十三年云不踰年卒則其
卒當在大有十四年矣唐摭言定保自序

定保生於咸通庚寅由其生年順推至天
福六年定保卒年實七十二歲又序中稱
從翁丞相溥按同時有兩王溥皆至丞相
一字德潤不知何所人唐昭宗蒙難東內
天復元年溥說衛軍執劉李誅殺之昭宗
反正驟拜中書侍郎同平章事新唐書有
傳一字齊物并州祁人周顯德元年太祖
疾革召學士草制以爲中書侍郎平章事

宋史有傳今定保序中稱王溥爲丞相不知其所指如指宋之王溥則入相在顯德元年卽南漢乾和十二年其年定保已八十五歲而作撫言時又在溥爲丞相後其卒更不知何年矣據通鑑之文考之則定保卒後十三年齊物始居相位年旣參差又序稱溥爲從翁是於溥爲同族今定保籍南昌而齊物居并州鄉貫亦各異知序

異

中所云丞相爲唐之王溥也今從通鑑又
陳振孫書錄解題謂定保光化三年進士
喪亂後入湖南蓋登第之年已三十一歲
撫言內韓偓入翰林一條稱朱全忠爲梁
太祖則是書作於乾化三年以後矣

南漢書考異卷九終